

Filipai

Pol re Filipai kwomri tatame remne basrasem siglow.

Kiyi late tuma.

Gwor siglow Pol re basrasem, re Filipai kwomke temenem Jisas rene habobo tatame remne newopitim. Kiyi Filipai kwom et Masedonia yokwo, Rom nowselke temenem. Er kwom som tetane, rem agerbo sig Kavala webu. Gwopte Kavala et Gris nowselke tetane.

Kiyi Pol re sip poten kersikap ok kelaruke wum, Yurop yokwok yin re Filipaika yin God reri Tuma Yenbo etek wesowbem. (Aposel 16:8-40 etek late) Rane tatame rem reri tuma omuteke metem, rem Jisas rene habobo tatame tem. Yuri re agerbo kwomke yim, rem rene ake yaperke poten rasem. Etek temenem, re metem, rane tame rem Filipairi Jisas rene omuteke habobo tatame remne yikokon agerbo wule remne peikem. Eker re gwor siglow basrasen remne newopitim. Eter basrasem tuma re pap yaper be metem, re Haneyen Jisas rene metekwasen remne tuma basrasem.

Tewri Pol re Haneyen Jisas eterri yaku nenbem, re kel merinbem. Filipairi Jisas rene habobem tatame rem rene kel newopitim, re Haneyen eterri yaku welepe sene nenbem. Eker, Pol re gwor siglow basrasen remne wese am.

Re God Reri Tuma remne op basrasem. God re kemne bukru wos nenem. Kraisi eterke re kemri wule yaper poten septim. Kraisi eterke kem pow tem. Kem yaku wuri be nenem. Kem Jisas rene omuteke habom, etopwou nenem, kem pow ek tem. Kem Kraisi reri wule heyar sete. Eter nenbempap kem etop nenbet. Kem kworer teitkwunen God reri yaku nenbet. Kem Kraisi eterkene temente, kem pap yenbo ten metekwaste. Pol re remne okbop ten etop basrasem.

1 ¹An Pol, nes Timoti rekene nes Kraisi Jisas reri yaku nen tame. Kem Kraisi Jisas reri Filipai kwomke tetane tatame, kemri taresi tamekene yaku nen tamekene, nes kemne gwor siglow basrasbo. ²Nemri Apiy God eter, nemri Haneyen Jisas Kraisi eter, rep kemne pap meten kwobo labet. Rep kemri pap pultebet, kem pap yenbo temente.

Pol re God rene wese am.

³An kemne habobo wule an ari God rene wese abo. ⁴An kemne aboyei habon God rene wemetbo, an metekwaskene rene wemetbo. ⁵Gwopkap wule an metekwasbo. Kem God Reri Tuma omuteke meten yabelke, kem tobotan yin gwotepte mere, kem anne kwobo labo. Kem arenkene Krai reri Tuma Yenbo wesowbo yaku som kirkir nenbo. ⁶An sanetene, God re kemne potbo yaku yenbo tobotan nenen yin yin Krai Jisas re sene yate yabelke re er yaku ek legete tetane. ⁷Kem ari meseke mogulke tetane. An kemne etopkap habobo, et yenbo. God reri pap metbo wulek re anne yaku yenbo newon kem ari yaku nen tamesip tetane. Gwopte an ake yaperke tetane. Kiyi an kebesewuren Krai eterri Tuma Yenbok ei wuran kwobo lan heyar wesowbem, an kemri kuwk teten yin kem anne kwobo som labo. An mak temenbo, kem anne kwobo som labo. ⁸Krai Jisas eter re kemne metekwasen pap yewobokap, an kemne etopkap metekwasen tekatekabo. An kemne tuma sekene webu, God re etop sanetene.

⁹An God rene op wemetbo. Kem pap yewobo wule som poten bukrewai tete. Er pap yewobo wule re purekene ten kem wos yenbo wos yaper heyar se pete. ¹⁰Opkap kem heyar habon wos yaper be nente, wos yenbowou nente. Op nenen yin yuri Krai re aboyei tatame remne se pete yabel tete, re kemne tuma be nente, re kemne tatame yenbo wete. ¹¹Jisas Krai re keremkene tetane, re kemne kwobo labo. Eker kem yenbo woswou nenbet. Op nente, tatame rem God rene pir wen reri sig yenbo wete tetane.

Pol re ake yaperke temenem, nugwape tatame rem Tuma Yenbo som metbem.

¹²Ari gesmase, kem met. An ake yaperke tetane, God reri Tuma Yenbo wesowbo yaku et yike be keikeretene. Tatame rem God Reri Tuma som metbo. ¹³An gwor ake yaperke tetane, opkap, Keryen Yen Sisar reri akek tetane ei nai tamekene agerbo gwotek tetane tatamekene rem aboyei rem op metem. An Krai reri yaku nen tame, eker rem anne ake yaperke poten rasem. ¹⁴Etopwou bo. Nugwape gesmase rem mettene an gwotek tetane, eker rem be akbo. Rem Haneyen rene omutekewai habon mol pan tetebo, rem God Reri Tuma muresen wesowbo.

¹⁵Etemri rane rem wuribai yaper tetane, rem ari sig yenbo teitkwunte selbo. Rem tuma naurate selbo, eker rem Krai reri tuma wesowbo. Rane rem wuribai yenbo tetane, rem wule yenbo sekene nente selbo, eker rem Krai reri tuma wesowbo. ¹⁶Er tame rem sanetene, an Krai eterri Tuma Yenbo ei wurabo, eker rem anne pap yewon Krai reri Tuma Yenbo wesowbo. ¹⁷Wuribai yaper tetane tame rem sig bukrepotte habobo. Rem

mettene, an ake yaperke tetane, eker rem anne wule yaper degerbokene nente habobo. ¹⁸An be habobo! Tatame rem Kraisi reri tuma metbo, eker an okbop tebo. Metkereke wuribai tetane tame rem Kraisi reri tuma wesowbo, an okbop som tebo.

Pol re wem. An kelpo tementek, an Filipai remne kwobo labet.

¹⁹An sanetene, kem God rene anne wemetbo, Jisas Kraisi reri Wow re anne kitimena newobo, eker God re anne kwobo lan an ake yaper mesegente. Opkap an okbop tebo. ²⁰Wos wuri an omuteke habon ari pap me tewo tewobo. God re anne webokap an yaper kap nente. Kwokwos kwokwos, gwotepte mere, an selbo, an mol pan teten reri yaku muresen nenbet. Opkap an le kelpo tete, o an sate, ari wuribaikene wesomkene Kraisi re sig bukri arennek potte. ²¹An op habobo. An temente, an Kraisi eterke reri yaku som nente. An sate, an Kraisi eterke yin an somsom temente. ²²An le kelpo temente, an nugwape tatame remne kebese kwobo labet. An be kelowke yite? An be sanetene. ²³Kelow pes tetane. Aren an selbo, an sate, an Kraisi rekene yin temente. Et yenbosubuwai. ²⁴An kemne kirkir habobo, opkap an kelpo temente, an kemne kebese kwobo late. ²⁵An gwor omuteke habobo. An keremkene som temente. Opkap an kemne kwobo late, kem omuteke habobo wule heyar sen okbop tete. An etop habobo. ²⁶Ekeya, an kemne sene lasyate. An keremkene temente, kem anne okbop ten boteyatete. Kem Kraisi Jisas reri sig bukri wete.

**Filipai tatame rem mus meten taskuren rem
God rene habobo tatame sespe tem.**

²⁷Bukri wos wuri tetane. Kraisi reri Tuma Yenbo kemne nente webokap, kem etopwou nenbet. Op nenbet, an kemne lasyate o, an be yate, an tumawou mette, an op mette. Kem muresen teten wuribai wuriwou ten kem yaku kirkir nenbo. Kem agerbo tatame remri wuribai lisokobo, rem Kraisi reri Tuma Yenbo omuteke kirkir metbo. An etop mette, selbo. ²⁸Kem peiktame remne kap akte. Kwokwos kwokwos kem mol pan tetete. Opkap kemri peiktame rem etop lan sanete, God re kemne kwobo labo, eker rem kemne mapurke teitkwunte. Kerem kem remne kebese teitkwunte. Rem etop sanete. ²⁹God re kemne yenbo wos nenem. Re kemne lebam, kem Kraisi reri yaku nenbo. Kem rene omuteke habobo, eker kem reri sigke mus kirkir metbo. ³⁰Kiyi kem lam, an peiktame remkene naibem. Gwopte kem metbo, an remkene som naibo. Kem anne ei wurate, nem remkene kirkir naite.

Nem wuribai wuriwou ten agerbo tatame remne yenbo nente.

2 ¹An kemne wemetbo. Kap, kem Jisas eterkene ten re kemne kitimena newobo? Kap, re kemne pap yewon kem pap yenbo tetane?

Kap, God Reri Wow re kemne kwobo labo? Kap, kem awosein awosein pap meten kwobo labo? ²Etop tetane wete, an kemne omuteke op webo. Kem kirkir te. Kem awosein awosein pap yewo. Kem purere wuribai wuriwou te. Kem op nente, an nugwape metekwaste. ³Kem kworer mane habon tuma kap naurate. Kem sig bukri kworer potte, kap habote. Kem kworer teitkwunen awosein awosein yenbo nenbet. Kem agerbo tatame remne op habote. Rem tatame yenbo, rem anne teitkwuntene. ⁴Kem kemri woswou kap habon lakerete. Kem awosein awosein lakeren kwobo labet.

Krais re kworer teitkwunemke, God re reri sig bukri wem.

- ⁵Krais Jisas reri wuribai purerekap kem etop habon nenbet.
⁶Krais re God eterkap kiyi temenem, gwopte som tetane. Re kworer teitkwunen God re tetanekap tete be habom.
⁷Eterri wuribaiki re kiyi temenemkap pelebitem re yaku nen tame tem. Re more tame ten nemkene tamesip tamesip tem.
⁸Op tem, re reri sig kworer teitkwunem, God re rene webemkap, re etopwou nenen yin sam. Re God reri kulke temenem, rem rene tame yaperkap mek kwuren peikkeren sam.
⁹Op tem, God re rene wow sene newom, rene ikyawai tetane emik nenewayen teten rene sig bukriwai newom. Er newom sig re aboyei sig teitkwuntene.
¹⁰Sene aboyei Hevenke tetane was, aboyei nowselke tetane was, aboyei sel purik tetane was, aboyei, rem Jisas reri tewo tobok gulke pate.
¹¹Gulke pate, rem aboyei kwom geike op wete. Jisas Krais re Keryen Yen. Op wetek, Apiy God reri sig hadebaswai tete. (Aisaia 45:23)

Nem tatame etemne tuwkap keremete.

¹²Ari tame nowu yenbo. Kiyi an keremkene temenem, kem ari tuma heyar meten nenbem. Gwopte an keremkene be tetane, kem sene etop heyarwai nenbet. God re kemne potte wem. Op tetane, kem kworer teitkwunen aken polpolen yaku keren yin God re kemne ek potte. ¹³God re keremkene tetane. Kwokwos kwokwos re kemne wuribai yenbokene kitmenakene newobo, opak reri webokap kem kirkir ten kebese nenbet.

¹⁴Be was kem nente, kem tuma kap kente, tuma kap naurate. ¹⁵⁻¹⁶Kem etop nentek, kem yaper was wuri be nente, kem yenbo waswou nente. Kem God reri yen yenbo ek temente. Kem nowselri tatame etemkene tetane, kem etemne tuwkap kerete. Rem yikokobo, rem wule yaper nenbo tatame. God re tatame remne potbo tuma kem remne wesowte. Kem etop nentek, Krais re Tatame Remne Se Pete Yabelke an kemne metekwaste tetane. An op habote tetane. An kemne nenbem yaku, bupo be tem. Yehow. Ari nenbem yaku et yenbo tem, opak an kemne metekwaste.

¹⁷Kem God rene omuteke habon reri yaku nenbo, et kem God rene kwar pebokap. God eterri wos. An kemne kwobo lan sate, et ari nep eterne kirkir kwar pebokap. Etop tetek, an kirkir ten metekwaste. An keremkene boteyaten metekwaste. ¹⁸Etopkap, kerem mere, kem metekwasen arenkene boteyaten metekwaste.

Pol re Timoti rene Filipaike werasen yite wem.

¹⁹Haneyen Jisas re kirkir tetek, keraket tete, an Timoti rene werasen re kemne lasyate. Kerem tetanekap re anne sene yan wesowte, an pap kwuye mette. ²⁰Timoti eterwou re arenkene nes wuribai wuriwou ten kemne nugwape habobo. ²¹Nugwape tatame rem etemri woswou nente habobo. Rem Jisas Krai reri yaku be habobo. ²²Timoti re God reri yaku yenbo nenbo tame, kem etop mettene. Nes Timotikene nes yen hakap Tuma Yenbo wesow yaku nes kirkir etop nenbo. ²³Be wos anne tete, an sanete, an rene agetage werasen re kemne lasyate. ²⁴An Haneyen rene omuteke habon wemetbo, keraket tete, aren mere, an kemne lasyate.

Pol re Epafroditus rene Filipaike werasen yite wem.

²⁵An habobo, an nemri mase, Epafroditus, rene kirkir weraste, re kemne lasyate. Re ari wuri yaku nen sip, re ari tame nowu. Kiyi kem rene anne werasen yan re anne kwobo labem. ²⁶Re sanetene, kem metem re yaper bukri metem, eker re pap yaperwai ten kemne tekatekan lasyate wem. ²⁷Tuma sekene. Kiyi re yaper bukri metem, re sate keraket tem. Sene God re rene pap meten heyarem. God re eternewou pap be metem. Yehow. Re anne pap kirkir meten re be samke, an pap yaperwai be tem. ²⁸Op tem, an tekatekan rene, kemne werasen yate nenbo. Opkap kem rene sene late, kem okbop tete. Aren mere, an pap kwuye mette. ²⁹Epafroditus re kemne lasyate, kem Haneyen reri sigke rene okbop ten nar potte. Eterkap tatame remne kem sig yenbo wete. ³⁰Kiyi kem Epafroditus rene werasen anne kwobo late wem, re etop heyar habon nenbem. Re reri wesomwou be habom, re Krai reri yaku nenen yin re sate keraket tem.

Krais rene omuteke habobo tatame rem tatame yenbo.

3 ¹Ari gesmase, an kemne tuma kera sene wete. Kem Haneyen eterkene tetane tatame, kem rene metekwasbet. An habobo, gwor tuma et keremne kwobo late tuma. Opkap an kemne kiyi wem tuma kupakene sene basrasbo.

²Kem ei site. Wule yaper nenbo tame rem tetane. Rem wale yaperkap. Rem kemne wes tate yak rin eger tebo. ³Etem rem mare tumas kutebo wule bupo me nenbo. Nem bo. Nem wule sekene op nenbo. God Reri Wowke nem God rene heyar lomyokwobo. Nem Krai Jisas eterkene

ten metekwasbo. Nem tamek nenbo wule omuteke be habobo. ⁴Metye. Tamek nenbo wule nenbo tame, re yenbo tete wem, an tamek nenbo wule kirkir nente wem. Tamek nenbo wule sebo tame, remne an teitkwuntene. ⁵Kiyi nawiy te anne warwiyem, yabel letrane kelare pes kere tem, rem anne mare tumas kutem. Ari nawiy apiy rep Israelri tatame, rep Benjamin reri tame beig. Rep Hibru tumak namrebem, aren mere etop tetane. Moses Reri Wule aboyei an sen Farisi tame tetane. ⁶An Moses Reri Wule sikabe sebemke, an pap nugwape yokbem, Jisas rene habobo tatame remne yaper nenbem. Moses Reri Wule ab heyar sebo kap, an wule wuri be biragiyem. Rem anne etop sanetene. ⁷Kiyi an habom, an Moses Reri Wule ab sen et wos anne kwobo bukre labem. Sene bo. Gwopte an Krai rene omuteke habobo, an kiyiri wule magel tayem. ⁸Moses Reri Wulewou bo. An webo, aboyei tamek nenbo wule mere, et wule bop. Tatame rem naku betake septibokap, an agerbo wule ab septim. An areri Haneyen Krai rene Jisas rene heyarwai sanete, an er wulewou sete habobo. Et wule bukrewai. An Krai eternewou semowbo, eker an aboyei agerbo wule mesegenem. An rene heyar keikeren ⁹eterkene wuribai wuriwou tem. An sene be habote, an Moses Reri Wule heyarwai setek, an tame yenbo tete. Yehow. An wule wuriwou nenbo, an tame yenbo tebo. An Krai eternewou omuteke habobo. Nem rene omuteke habobo, God re nemne tatame yenbo webo. ¹⁰Krai re tetanekap, an etop heyar sanete selbo. Re wow sene poten selek sene wayen yim, an er kitimena kirkir sanete selbo. Eter mus meten taskurbemkap, an kirkir taskurte selbo. Re wule yaper teitkwunen samkap, an kirkir etop sate selbo. ¹¹Opkap, an op habobo. An sate, God re anne wow sene newon sele meike nenewayen site.

Pol re murese amen God reri kubu tobo potte selbo.

¹²An be webo, an Krai reri wule ab nenen an tame yenbo tem. Yehow. An webo, Krai re anne heyar keikeretene, eker an yaku bukre som nenen reri wule heyar sete pap som tewo tewobo. ¹³Jisas rene habobo gesmase. Ari tuma sekene. An Krai reri wule aboyei heyar be setene. Wos wuri an nenbo. An kiyi temenemkap sene be habobo. An yuri tementekap etopwou habon yaku bukre nenen potte. ¹⁴Opkap an amen saguna yin kubu tobo potte selbo. Kubu tobo re gwopkap. Krai rene Jisas eterke God re anne wepotem, an Hevenke yawun heyar somsom etek temente.

¹⁵Nem Jisas rene habobo sespe tem tatame, nem etopkap wuribai tetane. Kem rane kem etopkap wuribai be tetane, God re kemri wuribai heyarte. ¹⁶Metye. Wule yenbo nem kiyi poten sebo kap, nem etop heyar omuteke som sete.

¹⁷Gesmase, aren nenbokap, kem kirkir etop nenbet. Nem kemne wule yenbo peterabem. Nemri nenbokap nenbo tame, remne kem heyar late, remri

nenbokap kem kirkir etop nenbet. ¹⁸Nugwape tatame rem wule yaper som nenbo, rem Krai reri mek kwuren peiken sam tuma be habobo. Rem reri peiktame tetane. Tewo nugwape an kemne etop wesowbem. An kemne etop sene wesowbo, an pap yaper ten kirabo. ¹⁹Er tatame rem remri wesomwou habon nenbo, et rem sukwiye wurabo wule nenbokap. Rem sebera yabo was nenbo. Rem nowselri woswou habobo. Op nenbo tatame rem ker kwomke yite tetane. ²⁰Nem opkap bo. Neremri kwom et Heven. Nem Nemne Potbo Tame, Haneyen Jisas Krai eterne kowtene. Re Heven mesegenen yerte, re nemne potte tetane. ²¹Krai reri kitimena et bukrewai, re aboyei was kebese teitkwunen rem reri kulke temente. Re yate yabel, re nemri kitimenakene bo more wesom lugen reri wesom hadebaswaikap, re nemne newote.

Nem wuribai yenbo wuriwou ten metekwaste.

4 ¹Ari tatame nowu. An kemne weyekap, kem Haneyen eterke mol pan tetete. Kem ari meseke mogul. An kemne tekatekan gabon metekwasbo.

²Yuodiakene Sintikekene, kep Jisas rene habobo ta. Kep tasip tasip. Setate. An kepne omuteke weba, kep wuribai wuriwou te. ³Ari yaku nen tamesip yenbo, an nene kirkir weba. Ne ta pes repne kwobo late, rep gwule kelmenate. Rep Klemenkene agerbo tamekene rem arenkene yaku kirkir nenbem sip. Nem yaku bukri keren God eterri Tuma Yenbo wesowbem. Somsom temente tatame etemri sig basrastene siglowke, etemri sig etek kirkir tetane.

⁴Haneyen re keremkene tetane, eker kem rene kwokwos kwokwos metekwasbet. An kemne sene weba. Kem metekwasbet.

⁵Kem tatame remne heyar elen me nenen wule yenbo peterate. Kem habo. Haneyen re sene yate yabel matnaye. ⁶Kem hekna habona was sou kap habote. Kem be was merinte, kem God rene wese an rene ek wemete. ⁷Etop nente, God re kemne pap pultete tetane. Reri pap pultebo wule re burkrewai, nem tatame nem kebese be sanete. Er wulek, kemri purere wuribaikene Krai Jisas eterkene heyar temente.

⁸Gesmas, an kemne tuma wuri nab wete. Keremri wuribaikene kem gwopkap wulewou habobet. Be wule et wule sekene, wule yembokene kem etopkap wule habobet. Be wule et sebera ya wule bo, be wule et yaper bo, kem etop habobet. Be wule et sig yembokene wule, kem etop habobet. Le kwuye labo was kem etop habobet. Be wule reri sig bukri wetek, kem etop kirkir habobet. Kem etopkap woswou habobet. ⁹An kemne kiya wepeikbem tumakene kemne kiya peterabem wulekene, kem etop som nenbet. Nemne pap yenbo tebo wule newobo God, re kemkene temente.

Filipai rem Pol rene kel newopitim, Pol re remne okbop tem.

¹⁰Kiya kem anne kwobo lam, gwopke kem anne sene habon kel newopitim, eker an Haneyen eterkene okbop tebo. An be weba kem

anne kwobo sene be labo. Yehow. Kiyi kem anne kwobo late habom, kem anne be kelowke newopitite yate wem. ¹¹Tatame rem anne kwobo be labo, an be webo. Yehow. An opkap purere potem. Be wos an tetane, an metekwasbo. An sou sagkene an pap yenbo temente. An wosbas heiksete, an pap yenbo som temente. ¹²An wosbas heikse temenem, an sou sagkene temenem. Eker an berasmenem purere op potem. Be wos be wos arenkene tetane, an pap yenbo tetane. An kwoi meg sibo, an awos an seke tebo, an pap yenbo temenbo. An nugwape wos sebo, an wos merinbo, an pap yenbo som temenbo. ¹³Mapkap mapkap wos anne tete, Krai re anne kitimena newobo, eker an kitimena poten kebesse taskurbo.

¹⁴Kem anne kwobo lam, kem wule yenbo anne nenem. ¹⁵Kem Filipairi tatame, gwopkap kem mettene. Kiyi an God reri Tuma Yenbo tobotan wesowbem, an keremri yokwo, Masedonia, mesegenen yimke, agerbo kwomri Jisas rene habobo tatame rem anne kwobo la kel be newobem. Keremwou kem anne kel newobem. ¹⁶Sene an Tesalonaika kwomke temenem, an kel merinemke, tewok tewok kem anne kwobo la kel newopiti yabem. ¹⁷An kel potte be habobo. An selbo, kem wule yenbo som nenbet, eker God re kemne tokwo yenbo sein degerbokene newote tetane. ¹⁸Epafroditus re kemri newopiti yam kel, anne sen yan newom. An potem, an kebesem. An heyarwai tetane. Er kel et God rene kwar pebokap. God re opkap kwar bos yenbo metbo, kemri yenbo nenbokap labo, re okbop ten boteyatebo. ¹⁹Be wos be wos kem merinte, ari God re kemne newote tetane. Re nugwape nugwape yenbo wos tetane. Eker re Krai Jisas eterke kemne kebesse newobet. ²⁰God re neremri Apiy, re neremri Keryen Yen. Nem reri sig hadebaswai som webet. Et sekenewai.

Pol re Filipai remne pir wem.

²¹Godkene Krai Jisaskene repri tatame, kemne wulare wulare an pir webo. Arenkene tetane Jisas rene habobo gesmase rem kemne kirkir pir webo. ²²Gwotek tetane God reri tatame aboyei rem kemne pir webo. Keryen Yen Sisar eterri akek tetane tatame, reri yaku nenbo tatamekene rem kemne nugwape pir webo.

²³Haneyen Jisas Krai reri pap meten kwobo labo wule re keremkene wulare wulare temente.